



JUNGI GARDE
JUNTERESSLI

Fasnacht 2024

Barbie

In der Wält, wo alli Barbie haisse
und jeede Daag e Party schmaisse.
Und Ken – e so haisst jeede Maa,
ganz glyych wär s isch und waas är kaa.

In Highheels, schlangg und immer gstylt,
wird s mit der ganze Wält denn dailt,
dert syg s perfäggt, me läbt fir immer,
in der Barbieworld – im pingge Glimmer.

Jä wääre mir wiirgglig lieber deert,
wo alli aitel sinn und s kaine steert,
dass niemer vo dääne sich mool iiberleggt,
was wiirgglig im Innere vo aim so steggt.

Doch ebbis, wo deert faggtisch stimmt,
dä Ort isch vo Fraue fescht bestimmt.
S Matriarchat wird gläbt – d Barbie het s Saage,
der Ken isch zer Zierde – darf sich nit beklaage.

Und wenn du die Baabe mol gseesch ooni Glaider,
mien mir saage s isch d Wooret, will laider,
hänn d Macher bim Ken – mir finde s vermässe,
bi der Produktion ganz aifach sy Pfyfli vergässe.

D Chefetage bi uns – so kunnt s ys voor,
sinn greeschedails Männer – noo wie voor.
Me stellt sich das voor, me wurd das mol keere,
s wääre d Fraue oobe – wurde d Männer beleere.

Im Sitzigszimmer e greativs Dängge,
der Fokus immer uff s Guete am längge.
Au d Männer wurde ebbis nutze,
kennte zwischeduure d Fänschter butze.

Wie wär s in Basel, was wurd sich ändere?
Wär wurd me gsee duur s Roothuus schländere?
Mache mir s do politisch villicht e weeneli schlächt?
Oder isch unseri Quote ächt grad rächt?

Der Vogel Gryff – däm goot s an Kraage,
duet bald e pinggi Barbie draage.
De Eeregsellschafte wird scho glyy droot,
mit knalligem Pingg und Rooseroot.

S Joggeli liichtet nimm blau und root.
Der FCBarbie jetzt deert uff em Raase stoot.
In Highheels spiile die – wirsch gsee,
besser als der FCB.

D Schütteler gseesch denn umme laufe,
am Popcorn und am Bier verkaufe.
Als Dangg bikemme sii e Reesli
und bim näggschte Jubliäum verkaufe sy Leesli.

Was schwiirig wär an der Basler Barbie-Stadt,
s Laufe wär deert nimm so glatt.
Will d Steggelischueh – s isch nit grad s Bescht,
stegge zwische Bsetzi-Stai und in Schiine fescht.

Wie wär s, wenn all Daag d Sunne wurd schyyn
und nit zwischeduure e Welggli duet gryyne?
Mir wurde s allwääg bald vermisse,
nit z saage: «s Wätter isch verschisse».

Und denn au vor em Morgestraich.
Sy wääre nit so mystisch – s wär e Saich -
die vier Schleeg vo der Kiircheglogge,
wenn du scho waisch – s blybt sicher drogge.

Au der Cortège, s wär kai Sääge,
nur mit pinggem Räpplirääge.
Jeedi Larve rooseroot,
so dass aim s Luege bald vergoot.

S isch besser mir gseen s glyy scho yy
die farbig Fasnacht do am Ryy.
Und hesch du s Gfyyl du muesch ebbis drille,
kennsch sy jo jetzt – die rooseroot Brille.

Mechtsch aafoo Pfyffe oder Drummle, bisch mindischdens
7 Joor alt und hesch Luscht zem sälber Fasnacht mache?
So mäld dy lieber hit als morn bim Obmaa vo de Junge, em
Nicolas Bringolf nicolas.bringolf@gmail.com oder kumm
diräggts ans Yschrybe an dr 1. Lektion im Glaibasel
vom 2. Meerz 2024, 10:30 bis 14:00. Mir freuen ys uff Dii!
